



**Broj: 02-50-1-16-25/09
Sarajevo: 5.3.2009. godine**

**BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM**

PREDMET: Obavještenje

Dom naroda Parlamentarne skupštine BiH, na 25. sjednici, održanoj 26.2.2009., razmatrao je sljedeće tačke dnevnog reda:

1. Prijedlog zakona o zaštiti i dobrobiti životinja (drugo čitanje), predlagač: Vijeće ministara BiH;
2. Prijedlog zakona o genetički modificiranim organizmima (drugo čitanje), predlagač: Vijeće ministara BiH;
3. Prijedlog zakona o dopuni Zakona o Javnom radiotelevizijskom sistemu BiH (drugo čitanje) predlagač: Vijeće ministara BiH;
4. Prijedlog zakona o dopuni Zakona o carinskoj tarifi BiH (prvo čitanje), predlagač: Vijeće ministara BiH;
5. Prijedlog zakona o Agenciji za razvoj informacionog društva BiH (prvo čitanje), predlagač: Vijeće ministara BiH;
6. Prijedlog zakona o zrakoplovstvu BiH (prvo čitanje), predlagač: Vijeće ministara BiH;
7. Prijedlog zakona o Agenciji za pružanje usluga u zračnoj plovidbi (prvo čitanje), predlagač: Vijeće ministara BiH;
8. Izjašnjavaње o Prijedlogu zakona o maloljetnim počiniocima krivičnih djela i krivičnopravnoj zaštiti djece i maloljetnika (prvo čitanje), predlagač: Vijeće ministara BiH;
9. Prijedlog zakona o besplatnoj pravnoj pomoći (prvo čitanje), predlagač Vijeće ministara BiH;
10. Prijedlog zakona o međunarodnoj pravnoj pomoći u krivičnim stvarima (prvo čitanje), predlagač: Vijeće ministara BiH;
11. Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera (prvo čitanje), predlagač: Vijeće ministara BiH;
12. Prijedlog zakona o izmjenama i dopunama Zakona o ministarstvima i drugim organima uprave BiH (prvo čitanje), predlagač: Vijeće ministara BiH;
13. Prijedlog zakona o izmjenama i dopunama Zakona o državnoj službi u institucijama BiH (prvo čitanje), predlagač: Vijeće ministara BiH;
14. Prijedlog zakona o izmjenama i dopunama Zakona o Agenciji za rad i zapošljavanje BiH (prvo čitanje), predlagač: Vijeće ministara BiH;
15. Prijedlog zakona o izmjenama i dopunama Zakona o policijskim službenicima BiH (prvo čitanje), predlagač: Vijeće ministara BiH;
16. Odluka Predsjedništva BiH o postavljenju profesionalnih vojnih lica na formacijska mjesta u Oružanim snagama BiH;
17. Odluka Predsjedništva BiH o učešću pripadnika Oružanih snaga BiH u misiji Snaga međunarodne sigurnosne pomoći (ISAF) u Islamskoj Republici Afganistan;

18. Odluka Zajedničke komisije za administrativne poslove o izmjenama Pravilnika o međunarodnim aktivnostima Parlamentarne skupštine BiH – radi potvrđivanja;
19. Izvještaj o radu Interresorne radne grupe za izradu Prijedloga zakona o imunitetu;
20. Izvještaj o aktivnostima na projektu „Autoput na Koridoru Vc“ i Plan narednih aktivnosti;
21. Imenovanje predsjedavajućeg, zamjenika i članova, Nezavisnog odbora i Odbora za žalbe građana, kao nezavisnih tijela policijske strukture BiH (Prijedlog Ad hoc zajedničke komisije za provođenje procedure imenovanja Nezavisnog odbora i Odbora za žalbe građana)
22. Davanje saglasnosti za ratifikaciju Izmjena Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija o finansijskoj saradnji;
23. Davanje saglasnosti za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc;
24. Davanje saglasnosti za ratifikaciju Sporazuma između Bosne i Hercegovine i Švicarske o olakšicama kod izdavanja viza,
25. Davanje saglasnosti za ratifikaciju Sporazuma između Bosne i Hercegovine i Švicarske o readmisiji lica koja borave bez dozvole;
26. Davanje saglasnosti za ratifikaciju Okvirne konvencije Svjetske zdravstvene organizacije o kontroli duhana;
27. Davanje saglasnosti za ratifikaciju Memorandumu o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanja, tehnološki razvoj i ogledne aktivnosti;
28. Davanje saglasnosti za ratifikaciju Sporazuma o zaštiti tajnih podataka između Vlade Slovačke Republike i Vijeća ministara BiH;
29. Davanje saglasnosti za ratifikaciju Sporazuma između Vijeća ministara BiH i Vlade Crne Gore o saradnji u oblasti kulture;
30. Davanje saglasnosti za ratifikaciju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit.

Ad. 1.

Dom naroda jednoglasno **je usvojio** Prijedlog zakona o zaštiti i dobrobiti životinja u drugom čitanju sa sljedećim amandmanima :

Amandman I.

U članu 2. u tački d) umjesto riječi: „napuštenih i izgubljenih” upisuju se riječi: ”napuštenih, izgubljenih i uginulih”.

Amandman II.

U članu 3. iza tačke dodaje se nova rečenica koja glasi: "Zabranjeno je životinju mučiti i namjerno izlagati stresu i strahu".

Amandman III.

U članu 4. Prijedloga zakona unose se sljedeće izmjene:

- na kraju tačke f) umjesto interpunkcijskog znaka tačka-zarez upisuje se zarez i dodaje tekst: „uključujući borbe pasa, bikova, medvjeda, pijetlova, kao i svih ostalih životinja“;
- u tački i) iza riječi „životinje“ upisuje se interpunkcijski znak tačka-zarez i briše se ostatak teksta;
- u tački j) iza riječi "lovu" dodaju se riječi: "i ribolovu";
- iza tačke v) dodaju se nove tačke: z), ž), aa), bb), cc), dd), ee), ff), gg), hh) i ii) koje glase:
 - “z) upotrebljavati nedopuštene zamke za hvatanje životinja;
 - ž) uzgajati životinje u svrhu proizvodnje krzna;

- aa) držati životinje u cirkusima te ih koristiti u cirkuskim predstavama s drugim životinjama;
- bb) organizirati utrke pasa na tvrdim podlogama;
- cc) koristiti tehničke uređaje, pomagala ili naprave kojima se u obliku kazne utiče na ponašanje životinja, uključujući bodljikave ogrlice ili sredstva koja uključuju upotrebu električne energije ili hemijskih supstanci;
- dd) uzgajati životinje na način da trpe bol, patnju i strah te ih namjerno ozljeđivati, protivno pravilima struke, odnosno najnovijim naučnim dostignućima, te uvoziti i prodavati životinje koje potiču iz takvog uzgoja;
- ee) povećavati agresivnost životinja selekcijom ili drugim metodama;
- ff) davati žive životinje kao nagrade u igrama na sreću;
- gg) prisiljavati životinje na ponašanje koje kod njih izaziva bol, patnju, ozljede ili strah;
- hh) izlagati životinje nepovoljnim temperaturama i vremenskim uslovima, protivno prihvaćenim zoohigijenskim standardima za pojedinu vrstu ili nedostatku kisika, čime se kod životinja uzrokuje bol, patnja, ozljede ili strah;
- ii) zanemarivati životinje s obzirom na njihovo zdravlje, smještaj, ishranu i njegu.”

Amandman IV.

U členu 5. iza tačke e) dodaju se nove tačke f) i g) koje glase:
 “f) ne izlagati životinju ekstremnoj toploti ili hladnoći;
 g) osigurati životinji dovoljno kretanja”.

Amandman V.

U členu 6. stav (3) mijenja se i glasi:

“(3) Zabranjeno je držati kao kućne ljubimce životinje koje su zaštićene, divlje životinje, te životinjske vrste i pasmine koje su opasne za život”.

Dodaje se novi stav (4), koji glasi:

“(4) Imaoci kućnih ljubimaca moraju osigurati kontrolu razmnožavanja životinja pod njihovim nadzorom.”

Amandman VI.

Iza člana 6. dodaje se novi član 6.a, koji glasi:

“Član 6.a.

Uzgoj kućnih životinja namijenjenih prodaji ne može početi bez rješenja o zadovoljavanju uslova koje donosi nadležno ministarstvo, na prijedlog Ureda.”

Amandman VII.

U členu 7. dodaje se stav (3), koji glasi:

“(3) Ured će voditi registar svih označenih pasa i mačaka”.

Amandman VIII.

Član 8. Prijedloga zakona mijenja se i glasi:

- (1) Kućni ljubimci ne smiju se prodavati licima mlađim od 18 godina, osim ako imaju dozvolu (ako su u pratnji) roditelja ili staratelja.
- (2) Zabranjena je prodaja egzotičnih životinja i životinja koje su zakonom zaštićene.
- (3) Zabranjena je prodaja kućnih ljubimaca na tržnicama i sajmovima.
- (4) Prodaja kućnih ljubimaca dopuštena je samo u trgovinama za prodaju kućnih ljubimaca koje ispunjavaju posebne uslove i imaju izdato rješenje nadloženog organa:
 - a) da je za svaku životinju osiguran dokaz o njenom porijeklu i zdravstvenom stanju;
 - b) da su zaposleni u trgovinama osposobljeni za brigu o životinjama i za izdavanje pisanog uputstva o odgovarajućem načinu držanja životinja koje prodaju.
- (5) Zabranjeno je prodavati pse i mačke u trgovinama za prodaju kućnih ljubimaca.
- (6) Nadležni organ propisuje posebne uslove iz stava (4) ovog člana, te uslove za osposobljenost osoblja i način propisivanja uputa iz stava (4)b).

Amandman IX.

U članu 10. u stavu (4) tačke i) i k) brišu se.

Amandman X.

Iza člana 15. dodaje se novi član 15a., koji glasi:

“Član 15a.

- (1) U klaonici se sa životinjama mora postupati na sljedeći način:
 - a) životinje za klanje potrebno je po prispieću istovariti iz prijevoznog sredstva uz upotrebu odgovarajuće opreme, kako bi životinje pošteđeli uznemirenosti, straha, patnji i bolova;
 - b) životinju treba pažljivo voditi u krugu klaonice do prostora za smještaj i bez nanošenja bola, uz primjenu odgovarajućeg pribora za vođenje;
 - c) klaonice moraju biti opremljene odgovarajućim oborima ili stajama u koje životinje treba da budu smještene, zaštićene od nepovoljnih klimatskih uslova, hranjene i napajane do klanja;
 - d) životinje moraju biti omamljene odgovarajućim postupcima neposredno prije klanja, kojima se moraju dovesti u stanje neosjetljivosti i u tom stanju usmrtniti.
- (2) Klanje se mora obaviti upotrebom odgovarajuće opreme.
- (3) Bolesne i ozlijeđene životinje potrebno je klati na samom kraju, poslije klanja zdravih životinja, bez dodatnog izazivanja bola i mučenja.
- (4) Nadležno ministarstvo, na prijedlog Ureda, pobliže propisuje uslove za zaštitu životinja prilikom klanja.
- (5) Životinja se ne smije zaklati ako nije obavljen veterinarski pregled prije klanja i ako nije omamljena na propisan i stručan način.”

Amandman XI.

Iza člana 16. dodaje se novi član 16a., koji glasi:

“Član 16 a.

- “(1) Zabranjeno je prevoziti životinje ako bi se prijevozom izazvale patnja, bol, mučenje, oboljenja, uginuća životinja, kao:
 - a) utovar i prijevoz tijekom velike vrućine ili hladnoće;
 - b) prijevoz u nepokrivenim kamionima, vagonima, dijelu plovila, pri čemu životinje nisu zaštićene od klimatskih uslova;
 - c) prijevoz u zatvorenim prijevoznim sredstvima, kavezima i spremnicima ako u njima nije osigurano prozračivanje;
 - d) prijevoz životinja osjetljivih na niske ili visoke temperature ako tokom prijevoza nije osigurana odgovarajuća temperatura;
 - e) prijevoz bez osiguranja od samoozljeđivanja životinje, ozljeđivanja drugih životinja ili ispadanja iz prijevoznog sredstva;
 - f) prijevoz bez osiguranog hranjenja, napajanja i odmora životinja u propisanim intervalima;
 - g) prijevoz bolesnih životinja ili u slučaju postojanja sumnje da su bolesne ako nije osigurana veterinarska pomoć;
 - h) prijevoz životinja za koje postoji sumnja da boluju od zaraznih bolesti;
 - i) prijevoz vodenih životinja u posebnim prijevoznim sredstvima ili spremnicima bez dovoljne količine vode, odgovarajuće temperature i kisika;
 - j) prijevoz ženki u posljednjoj četvrtini bremenitosti, ženki u prvih 48 sati nakon okota i njihove mladunčadi, osim ako je potrebna hitna veterinarska intervencija;
 - k) zabranjeno je prevoziti materijale u istom prijevoznom sredstvu koji bi mogli biti opasni za njihovo zdravlje i život.
- (2) Obavljanje prijevoza na neki od načina iz stava (1) ovog člana smatra se mučenjem životinja.
- (3) Prijevoznik je dužan osigurati zaštitu od opasnih i divljih životinja, te njihovu fizičku zaštitu, a prijevozno sredstvo mora biti označeno tako da upozorava na prijevoz opasnih ili divljih životinja.
- (4) Prijevoznik je dužan odrediti lice koje će se tokom prijevoza brinuti o ispunjavanju propisanih

uslova za transport životinja, njihovom napajanju, hranjenju i odmoru, a koje mora biti stručno osposobljeno, čiji program obuke i osposobljavanja propisuje nadležno ministarstvo.

(5) Pri utovaru, istovaru, pretovaru i tjeranju zabranjena je upotreba predmeta kojima se životinji direktno nanosi bol.”

Amandman XII.

U članu 21. u naslovu brišu se riječi: “i cirkusa”, kao i u tekstu riječ “cirkusima”.

Amandman XIII.

U članu 22. u naslovu brišu se riječi: “i cirkus”.

U stavu (3) istoga člana brišu se riječi: “cirkuske priredbe sa životinjama”.

U stavu (4) brišu se riječi: “cirkuskih priredbi sa životinjama i”.

Amandman XIV.

U članu 25. u stavu (1) na kraju tačke c) dodaju se riječi: “i omogućiti joj dovoljno kretanja”.

U istom stavu dodaju se nove tačke: f), g), h) i i) koje glase:

“f) obaviti obaveznu sterilizaciju i kastraciju svih pristiglih napuštenih i izgubljenih životinja nakon isteka roka iz stava (2) ovog člana;

g) primati prijave o napuštenim i izgubljenim životinjama;

h) angažirati se na udomljavanju životinja i prolanaženju vlasnika;

i) mikročipovati svaku pristiglu životinju ako ona već nije mikročipovana.”

U istome članu iza stava (3) dodaje se novi stav (4), koji glasi:

“(4) Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet.”

Sadašnji stav (4) postaje stav (5), a na kraju ovog stava dodaju se riječi: “te vodi upisnik skloništa za životinje”.

Amandman XV.

U članu 28. iza stava (6) dodaje se novi stav (7), koji glasi:

“(7) Imaoci životinja za eksperiment dužni su:

- a) životinjama za eksperimente pružiti smještaj, hranu, vodu, brigu odgovarajuću njihovom zdravlju i dobrobiti;
- b) svesti na minimum ograničenja s ciljem zadovoljenja njihovih psihičkih i etioloških potreba;
- c) nadgledati okruženje u kojem se nalaze;
- d) svakodnevno provjeravaju njihovu dobrobit i zdravstveno stanje;
- e) otkloniti uzroke nezgoda, trpljenja, bola na najbrži mogući način;
- f) obilježiti životinje i voditi evidenciju.”

Sadašnji stav (7) postaje stav (8).

Amandman XVI.

U članu 37. u tački f) riječ “cirkusima” briše se.

U istom članu dodaju se nove tačke l) i m) koje glase:

“l) odluku o uslovima koje moraju ispunjavati uzgajivači kućnih životinja namijenjenih prodaji;

m) odluku o uslovima za prodaju kućnih ljubimaca u trgovinama za prodaju kućnih ljubimaca, te uslove za osposobljenost osoblja.”

Amandman XVII.

U članu 38. tačka d) mijenja se i glasi:

“d) drži kao kućne ljubimce životinje navedene u članu 6. stav (3) ovog zakona”.

U istom članu dodaje se nova tačka n), koja glasi:

“n) obavlja radnje u suprotnosti s članom 6a.”

Amandman XVIII.

U članu 39. u tački h) iza broja "16" dodaju se riječi i broj: "i 16a."
 U istom članu u tački i) iza broja "15" dodaju se riječi i broj: "i 15a."
 U istom članu dodaje se nova tačka s), koja glasi:
 "s) obavlja radnje u suprotnosti s članom 16a."

Amandman XIX.

U članu 40. dodaju se novi stavovi (2), (3), (4) i (5) koji glase:
 "(2) Imaoi pasa i mačaka dužni su u roku od šest mjeseci od dana stupanja na snagu ovog zakona mikročipovati i upisati u registar svoje kućne životinje rođene, odnosno nad kojima je stečeno vlasništvo prije stupanja na snagu ovog zakona.
 (3) Skloništa za životinje iz člana 25. moraju biti osnovana u roku od godine dana od stupanja na snagu ovog zakona.
 (4) Dok tijela predviđena ovim zakonom ne osnuju skloništa za životinje iz člana 25. ovog zakona, veterinarske stanice mogu, u saradnji s nadležnim općinskim tijelima, obavljati kastraciju, sterilizaciju i obilježavanje napuštenih životinja, naročito pasa lotalica, te ih ponovo puštati na mjesta prirodnog staništa, a s ciljem stabilizacije populacije napuštenih životinja kontrolom njihove reprodukcije u kratkom roku.
 (5) Odredba člana 4. ovog zakona o zabrani uzgoja životinja u svrhu proizvodnje krzna stupit će na snagu 2018. godine."

Usvojeni amandmani **identični su amandmanima usvojenim** u Predstavničkom domu,.

Dom naroda usvojio je i sljedeći **zaključak** :

„Zadužuje se Vijeće ministara BiH, resorno ministarstvo i nadležni Ured za veterinarstvo da u podzakonskim aktima Zakona o zaštiti i dobrobiti životinja dozvole organizovanje tradicionalnog takmičenja bikova na tradicionalnim manifestacijama.

Zadužuje se Vijeće ministara da sagleda aspekt tradicionalnog takmičenja i tradicionalnih manifestacija te pokrene izmjene Zakona o zaštiti i dobrobiti životinja.“

Ad. 2.

Dom naroda jednoglasno je **usvojio** Zakon o genetički modificiranim organizmima u drugom čitanju sa sljedećim amandmanima:

Amandman I.

U članu 1. u stavu (2) riječi: «genetički modificiranu hranu i hranu za životinje» zamjenjuju se riječima: «genetički modificirane organizme i proizvode od genetički modificiranih organizama, kao i žive modificirane organizme».

Amandman II.

U članu 2. u tački 25) iza riječi: „u poslovanju“ dodaju se riječi: „, s GMO-om“.

Amandman III.

Član 3. mijenja se i glasi:

„Član 3.
 (Nadležna tijela)

(1) U smislu ovog zakona, nadležna tijela su: Agencija za sigurnost hrane Bosne i Hercegovine (u daljnjem tekstu: Agencija), Ured za veterinarstvo Bosne i Hercegovine, Uprava Bosne i Hercegovine za zaštitu zdravlja bilja, tijela entiteta, kantona i Brčko Distrikta BiH nadležna za oblast poljoprivrede, šumarstva i vodoprivrede, oblast zdravstva i zaštite okoliša.

(2) Za provođenje ovog zakona, u slučaju kada se GMO i/ili proizvodi koji sadrže i/ili se sastoje i/ili potiču od GMO-a:

- a) ograničeno upotrebljavaju u kontroliranom zatvorenom sistemu - nadležna su entitetska ministarstva nadležna za pitanja nauke uz saglasnost tijela entiteta, kantona i Brčko Distrikta BiH nadležnih za oblast poljoprivrede, šumarstva i vodoprivrede i mišljenja ostalih nadležnih tijela;
 - b) namjerno unose u okoliš - nadležna su entitetska ministarstva za pitanja poljoprivrede, vodoprivrede i šumarstva, uz prethodno pribavljeno mišljenje ministarstva zdravstva i ministarstava nadležnih za zaštitu okoliša ;
 - c) stavljaju na tržište;
 - 1) kao hrana ili hrana za životinje - nadležna je Agencija uz prethodno pribavljeno mišljenje nadležnih tijela;
 - 2) kao reprodukcioni materijal u poljoprivredi i šumarstvu ili kao sredstva za zaštitu bilja - nadležna je Uprava Bosne i Hercegovine za zaštitu zdravlja bilja uz saglasnost tijela entiteta, kantona i Brčko Distrikta BiH nadležnih za oblast poljoprivrede, šumarstva i vodoprivrede;
 - 3) kao lijekovi ili reprodukcioni materijal u veterinarstvu - nadležan je Ured za veterinarstvo BiH uz prethodno pribavljeno mišljenje nadležnih tijela;
 - 4) pri upotrebi GMO-a i/ili proizvoda koji sadrže i/ili se sastoje i/ili potiču od GMO-a u kozmetici, farmaciji ili zdravstvenoj zaštiti ljudi - nadležna su entitetska ministarstva zdravstva i Brčko Distrikta BiH uz prethodno pribavljeno mišljenje nadležnih tijela;
 - 5) za inspeksijski nadzor označavanja u prometu GMO-a i/ili proizvoda koji sadrže i/ili se sastoje i/ili potiču od GMO-a - nadležne su entitetske uprave za inspeksijske poslove, kantonalne inspekcije, inspekcije unutar lokalnih tijela uprave i Inspektorat Vlade Brčko Distrikta BiH.
- (3) Nadležna tijela iz st. (1) i (2) ovog člana provodit će službene kontrole, inspeksijski i upravni nadzor u skladu s važećim zakonskim propisima u Bosni i Hercegovini, entitetima i Brčko Distriktu BiH. Nadležna tijela dužna su međusobno saradivati. Naučno-stručno tijelo osnovano u skladu s ovim zakonom dužno je nadležnim organima uprave iz st. (1) i (2) ovog člana pružiti stručnu pomoć u provođenju ovog zakona.
- (4) Agencija je centralno i koordinaciono tijelo za obavljanje stručnih poslova u vezi s GMO-om.”

Amandman IV.

U članu 4. u stavu (1) riječ „ovoga“ zamjenjuje se riječju „tog“.

Amandman V.

Član 5. mijenja se i glasi:

„Član 5.
(Izuzeci od primjene)

- (1) Odredbe ovog zakona ne primjenjuju se na:
- a) genetičke modifikacije koje se dobivaju primjenom jedne od sljedećih metoda (pod uslovom da ne obuhvataju korištenje rekombinantnih molekula nukleinske kiseline ili GMO-a različitih od onih proizvedenih jednom ili više tehnika/metoda navedenih u nastavu):
 - 1) mutageneza,
 - 2) fuziju stanica (uključujući i fuziju protoplasta) biljnih stanica organizama koji mogu razmjenjivati genetički materijal tradicionalnim uzgojnim metodama;
 - b) ograničenu upotrebu GMO-a koji nisu štetni za zdravlje ljudi i okoliš prema kriterijima određenim posebnim propisom;
 - c) kopneni, željeznički, zračni, pomorski i riječni prijevoz GMO-a;
 - d) postupanja sa živim modificiranim organizmima koji su opasni po okoliš na koja se primjenjuju odredbe posebnih propisa kojima se uređuju prijevoz, tranzit i postupanje s opasnim tvarima, ako ovim zakonom ili na osnovu njega donesenim propisom nije drugačije određeno;
 - e) samokloniranje koje se sastoji od uklanjanja sekvenci nukleinske kiseline iz stanice organizma koje može ali i ne mora biti praćeno ponovnim umetanjem cijele ili sekvence te nukleinske kiseline (ili sintetičnog ekvivalenta), s ili bez prethode enzimske ili mehaničke faze, u stanice iste vrste ili u stanice filogenetički blisko srodnih vrsta, koje mogu izmjenjivati genetički materijal prirodnim

fiziološkim procesima, gdje nema vjerovatnoće da će dobiveni mikroorganizam izazvati bolest kod ljudi, životinja ili biljaka.

Samokloniranje može uključivati upotrebu rekombinantnih vektora s već poznatom praksom sigurne upotrebe u određenom mikroorganizmu.”

Amandman VI.

U članu 17. u stavu (2) tačka d) glasi:

„d) „sadržaj mišljenja Vijeća za GMO.“

U stavu (2) tačka e) briše se.

Amandman VII.

U članu 22. stav (3) u tački c) na kraju teksta dodaje se riječ: „korisnika.“

Iza tačke c) ostale tačke postaju tačke d), e), f) i g).

Amandman VIII.

U članu 23. stavak (1) u tački b) riječ: „Odbora“ zamjenjuje se riječima: „Vijeća za GMO“.

U stavu (2) riječi: „Odbor za ograničenu upotrebu GMO-a dužan je“ zamjenjuju se riječima: „Vijeće za GMO dužno je“.

Amandman IX.

U članu 27. u stavu (2) riječi: „Odbora za ograničenu upotrebu GMO-a“ zamjenjuju se riječima: „Vijeća za GMO“.

U stavu (3) riječi: „Odbor za ograničenu uporabu GMO-a dužan je“ zamjenjuju se riječima: „Vijeće za GMO dužno je“.

U stavu (4) riječi: „Odbora za ograničenu upotrebu GMO-a“ zamjenjuju se riječima: „Vijeća za GMO“.

Amandman X.

U članu 28. u stavu (2) riječi: „Odbora za ograničenu upotrebu GMO-a“ zamjenjuju se riječima: „Vijeća za GMO“.

U stavu (4) riječi: „Odbor za ograničenu upotrebu GMO-a dužan je“ zamjenjuju se riječima: „Vijeće za GMO dužno je“.

Amandman XI.

U članu 38. u stavu (1) riječi: „Odbora za unošenje GMO-a u okoliš“ zamjenjuju se riječima: „Vijeća za GMO“.

U stavu (3) riječi: „Odboru za unošenje GMO-a u okoliš“ zamjenjuju se riječima: „Vijeću za GMO“.

U stavu (4) riječi: „Odbor za unošenje GMO-a u okoliš“ zamjenjuju se riječima: „Vijeće za GMO“.

U stavu (5) riječi: „Odbor za unošenje GMO-a u okoliš dužan je“ zamjenjuju se riječima: „Vijeće za GMO dužno je“.

Amandman XII.

U članu 40. u stavu (3) riječ: „dijela“ zamjenjuje se riječju: „poglavlja“.

Amandman XIII.

U članu 44. u stavu (1) iza riječi „pribavljenog“ dodaje se riječ „pozitivnog“, riječi: „Odbora za unošenje GMO-a u okoliš“ zamjenjuju se riječima: „Vijeća za GMO“, a na kraju teksta dodaju se riječi:

„GMO-a ili proizvoda od GMO-a“.

Amandman XIV.

U članu 45. stav (4) postaje stav (3).

Amandman XV.

U članu 46. u stavu (1) riječi: „Odbora za unošenje GMO-a u okoliš“ zamjenjuju se riječima: „Vijeća za GMO“.

U članu 46. u stavu (2) riječi: „Odbor za unošenje GMO-a u okoliš dužan je“ zamjenjuju se riječima: „Vijeće za GMO dužno je“.

Amandman XVI

U članu 47. u stavu (1) tačka b) mijenja se i glasi:

«b) pribavljanja pozitivnog mišljenja Vijeća za GMO;»

Amandman XVII.

U članu 50. u stavu (5) riječi: „nadležnog odbora“ zamjenjuju se riječima: „Vijeća za GMO“.

Amandman XVIII.

U članu 51. u stavu (4) riječi: „će se upotrebljavati“ zamjenjaju se riječima: „upotrebljavaju se“.

Iza stava (4) ostali stavovi postaju stavovi (5) i (6).

Amandman XIX.

U članu 53. u stavu (4) riječi: „provodit će“ zamjenjaju se riječju „provode“.

Amandman XX.

U članu 54. stavak (1) u toč. b) i c) riječ „te“ briše se.

U stavu (2) riječi: „propisat će“ zamjenjuju se riječju „propisuje“.

Amandman XXI.

Naziv Poglavlja VII. zamjenjuje se i glasi: „NAUČNO-STRUČNO TIJELO ZA PROVOĐENJE ZAKONA“.

Član 55. mijenja se i glasi:

„Član 55.

(Vijeće za GMO)

(1) Radi praćenja stanja i razvoja u oblasti postupanja s GMO-om i pružanja stručne pomoći nadležnim tijelima u provođenju ovog zakona, Vijeće ministara BiH, na prijedlog Agencije, s kandidatske liste iz naučnih, stručnih i obrazovnih institucija iz entiteta i Brčko Distrikta BiH odlukom bira Vijeće za GMO na mandat od četiri godine, s tim što mogu biti imenovani na još jedan mandat.

(2) Vijeće za GMO ima sedam članova, koji se biraju isključivo između eminentnih naučnika i stručnjaka iz oblasti mikrobiologije, genetike, medicine, veterinarske medicine, biokemije, molekularne biologije, farmacije, biotehnologije, poljoprivrede, šumarstva, prava, zaštite na radu, zaštite prirode i zaštite okoliša, vodeći računa o ravnopravnoj zastupljenosti svih naroda i odgovarajućoj zastupljenosti entiteta i Brčko Distrikta BiH.

(3) Vijeće za GMO između svojih članova bira predsjednika i njegovog zamjenika. Vijeće za GMO je samostalno i neovisno tijelo i njegov je rad javan. Vijeće za GMO odlučuje većinom glasova, koja uključuje najmanje po jednog predstavnika svakog entiteta i svakog konstitutivnog naroda.

(4) Vijeće za GMO donosi poslovnik kojim uređuje način rada.

(5) Sredstva za rad Vijeća za GMO i obavljanje stručno-administrativnih poslova osiguravaju se u budžetu institucija Bosne i Hercegovine.“

Amandman XXII.

Član 56. mijenja se i glasi:

„Član 56.
(Zadatak Vijeća za GMO)

(1) Vijeće za GMO obavlja sljedeće poslove:

- a) daje mišljenja o upotrebi GMO-a u upravnim postupcima i drugim postupcima po zahtjevu nadležnih tijela u skladu s ovim zakonom;
- b) daje mišljenje i predloge u pripremi propisa o upotrebi GMO-a;
- c) daje mišljenja i predloge nadležnim orgaima državne uprave o pitanjima upotrebe GMO-a;
- d) prati stanje i razvoj u oblasti korištenja genetičke tehnologije i upotrebe GMO-a;
- e) prati naučno-stručna dostignuća i daje mišljenja u vezi s upotrebom genetičke tehnologije i upotrebom GMO-a;
- f) daje mišljenja u vezi sa socijalnim, etičkim, tehničkim i tehnološkim, naučnim i drugim uslovima upotrebe GMO-a;
- g) savjetuje nadležna tijela o pitanjima vezanim za upotrebu GMO-a i genetičke tehnologije;
- h) izvještava javnost putem medija i stručnih skupova o stanju i razvoju u oblasti upotrebe genetičke tehnologije i upotrebe GMO-a, te o svojim stavovima i mišljenjima;
- i) obavlja i druge stručne poslove propisane ovim zakonom i propisima donesenim na osnovu njega.

(2) Vijeće za GMO podnosi godišnji izvještaj o radu. Izvještaj podnosi Agenciji, koja o njemu informira Vijeće ministara BiH i objavljuje ga na način dostupan javnosti.”

Amandman XXIII.

Član 57. briše se.

Brisanjem člana 57. članovi 58. - 73. postaju članovi 57. - 72.

Amandman XXIV.

U članu 62., koji je postao član 61., u stavu (1) iza riječi „ nadležni“ dodaje se riječ „inspekcijski“.

Amandman XXV.

U tekstu Prijedloga zakona unose se normativno-tehničke ispravke u sljedećim odredbama:

U članu 4. u tački a) brojevi člana: „11. i 36.“ zamjenjuju se brojevima: „10. i 35.“.

U članu 64., koji je postao član 63., u tački b) broj člana „29.“ zamjenjuje se brojem „27.“.

U članu 65., koji je postao član 64., u tački a) broj člana „17.“ zamjenjuje se brojem „16.“; u tački b) broj člana „ 19.“ zamjenjuje se brojem: „18.“ ; u tački c) broj člana „21.“ zamjenjuje se brojem: „20.“; u tački d) brojevi člana: „23. i 24.“ zamjenjuju se brojevima: „22. i 23.“; u tački e) broj člana „ 25.“ zamjenjuje se brojem „24.“; u tački f) broj člana „ 26.“ zamjenjuje se brojem „25.“; u tački g) broj člana „26.“ zamjenjuje se brojem „25.“; u tački h) broj člana „27.“ zamjenjuje se brojem „26.“; u tački i) broj člana „ 29.“ zamjenjuje se brojem „28.“; u tački j) brojevi Člana: „ 30. i 31.“ zamjenjuju se brojevima: „29. i 30.“; u tački k) broj člana „32.“ zamjenjuje se brojem „31.“; u tački l) broj člana „ 32.“ zamjenjuje se brojem „31.“; u tački m) broj člana „33.“ zamjenjuje se brojem „32.“; u tački n) brojevi člana: „36. i 37.“ zamjenjuju se brojevima: „35. i 36.“; u tački o) broj člana „40.“ zamjenjuje se brojem „39.“; u tački p) broj člana „41“ zamjenjuje se brojem „40.“; u tački r) broj člana „42.“ zamjenjuje se brojem „ 41.“; u tački s) brojevi člana: „43. i 48.“ zamjenjuju se brojevima: „42. i 47.“; u tački t) broj člana „51.“ zamjenjuju se brojem „50.“; u tački

u) brojevi člana: „52. i 53.“ zamjenjuju se brojevima: „51. i 52.“; u tački v) broj člana „55.“ zamjenjuje se brojem „54.“; u tački z) broj člana „15.“ zamjenjuje se brojem „14.“ i u tački aa) broj člana „16.“ zamjenjuje se brojem „15.“.

U članu 66., koji je postao Član 65., u st. (1) i (2) brojevi članaa: „65. i 66.“ zamjenjuju se brojevima: „63 i 64.“.

U članu 67., koji je postao član 66. brojevi člana: „65. i 66.“ zamjenjuju se brojevima: „63. i 64.“.

Amandman XXVI.

U članu 70., koji je postao član 69., u stavu (2) broj člana «72.» zamjenjuje se brojem „71“.

Usvojeni amandmani **identični su amandmanima usvojenim** u Predstavničkom domu.

Ad. 3.

Dom naroda usvojio je u predloženom tekstu Prijedlog zakona o dopuni Zakona o Javnom radiotelevizijskom sistemu BiH u drugom čitanju. S obzirom da jr Prijedlog zakona **usvojen u različitom tekstu** u odnosu na Predstavnički dom, Dom naroda imenovao je sljedeće delegate za **članove Zajedničke komisije za usaglašavanje teksta Zakona:**

- Alma Čolo
- Rudo Vidović
- Zoran Koprivica

Ad. 4.

Dom naroda usvojio je u prvom čitanju Prijedlog zakona o dopuni Zakona o carinskoj tarifi BiH.

Ad. 5.

S obzirom da u prvom krugu glasanja nije bilo entitetske većine, na sjednici Doma izvršeno je usaglašavanje u Kolegiju Doma kao komisiji (saglasnosti nije bilo), nakon čega je u drugom krugu glasanja, više od dvije trećine delegata iz jednog entiteta glasalo „protiv“ pa je tako Prijedlog zakona o Agenciji za razvoj informacionog društva BiH **odbijen u prvoj fazi razmatranja.**

Ad. 6.

Dom naroda jednoglasno je **usvojio** Prijedlog zakona o zrakoplovstvu BiH u prvom čitanju sa sljedećim zaključkom :

„S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o zrakoplovstvu BiH, produžava se amandmanska faza za ovaj prijedlog zakona do 24 sata prije održavanja sjednice Komisije na kojoj će biti razmatran.“

Ad. 7.

Dom naroda jednoglasno je **usvojio** Prijedlog zakona o Agenciji za pružanje usluga u zračnoj plovidbi u prvom čitanju sa sljedećim zaključkom:

„S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o Agenciji za pružanje usluga u zračnoj plovidbi, produžava se amandmanska faza za ovaj prijedlog zakona do 24 sata prije održavanja sjednice Komisije na kojoj će biti razmatran.“

Ad. 8.

Prijedlog zakona o maloljetnim počiniocima krivičnih djela i krivičnopravnoj zaštiti djece i maloljetnika nije dobio entitetsku većinu, pa slijedi **usaglašavnje u Kolegiju** kao komisiji.

Ad. 9.

Prijedlog zakona o besplatnoj pravnoj pomoći nije dobio entitetsku većinu, pa slijedi **usaglašavnje u Kolegiju** kao komisiji.

Ad. 10.

Prijedlog zakona o međunarodnoj pravnoj pomoći u krivičnim stvarima nije dobio entitetsku većinu, pa slijedi **usaglašavnje u Kolegiju** kao komisiji.

Ad. 11. – 15.

Dom naroda jednoglasno je usvojio sljedeće prijedloge zakona u prvom čitanju:

- Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera
- Prijedlog zakona o izmjenama i dopunama Zakona o ministarstvima i drugim organima uprave BiH
- Prijedlog zakona o izmjenama i dopunama Zakona o državnoj službi u institucijama BiH
- Prijedlog zakona o izmjenama i dopunama Zakona o Agenciji za rad i zapošljavanje BiH
- Prijedlog zakona o izmjenama i dopunama Zakona o policijskim službenicima BiH

Ad. 16. – 18.

Dom naroda potvrdio je sljedeće odluke:

- Odluka Predsjedništva BiH o postavljenju profesionalnih vojnih lica na formacijska mjesta u Oružanim snagama BiH
- Odluka Predsjedništva BiH o učešću pripadnika Oružanih snaga BiH u misiji Snaga međunarodne sigurnosne pomoći (ISAF) u Islamskoj Republici Afganistan
- Odluka Zajedničke komisije za administrativne poslove o izmjenama Pravilnika o međunarodnim aktivnostima Parlamentarne skupštine BiH

Ad. 19.

Dom naroda primio je k znanju Izvještaj o radu Interresorne radne grupe za izradu Prijedloga zakona o imunitetu, te usvojio sljedeći zaključak :

„Zadužuje se Vijeće ministara BiH da u parlamentarnu proceduru dostavi Prijedlog zakona o izmjenama i dopunama Zakona o imunitetu Bosne i Hercegovine“.

Ad. 20.

Dom naroda jednoglasno je usvojio Izvještaj o aktivnostima na projektu „Autoput na Koridoru Vc“ i Plan narednih aktivnosti

Ad. 21.

Prijedlog za imenovanje predsjednika, zamjenika i članova Nezavisnog odbora i Odbora za žalbe građana, kao nezavisnih tijela policijske strukture BiH (Prijedlog Ad hoc zajedničke komisije za provođenje procedure imenovanja Nezavisnog odbora i Odbora za žalbe građana) nije dobio entitetsku većinu pa slijedi **usaglašavnje u Kolegiju** kao komisiji

Ad. 22. – 30.

Dom naroda jednoglasno je dao saglasnost za ratifikaciju sporazuma iz ovih tačaka dnevnog reda.

Napomena: Želimo vas obavijestiti da je na 25. sjednici Doma naroda Parlamentarne skupštine BiH, zbog neopozive ostavke, dr. Mladen Ivanić razriješen dužnosti predsjedavajućeg Doma naroda Parlamentarne skupštine BiH, te je za predsjedavajućeg Doma naroda iz srpskog naroda imenovana Dušanka Majkić.

S poštovanjem,

PREDSJEDAVAJUĆA
DOMA NARODA
Dušanka Majkić